

জনমত : সংজ্ঞা, প্রকৃতি ও বৈশিষ্ট্য

১০.১

Public Opinion : Definition, Nature and Characteristics

রাষ্ট্রবিজ্ঞানে 'জনমত' একটি বহুল প্রচলিত শব্দ। প্রাচীন গ্রিস, রোম ও মধ্যযুগীয় রাষ্ট্রব্যবস্থায় জনমত কথাটির পরিচয় মেলে। তবে জনমত সম্পর্কে বিজ্ঞানসম্মত আলোচনার সূত্রপাত হয় গণতন্ত্রের বিকাশের সময় থেকে, বিশেষ করে ফরাসি বিপ্লবের সময় থেকে। ফরাসি দার্শনিক রুশো (Rousseau)-ই প্রথম জনমত কথাটিকে রাজনৈতিকভাবে প্রয়োগ করেন। তিনি বলেন, 'জনগণের অভিমতই ঈশ্বরের অভিমত' (Voice of people is the voice of God.)। বর্তমানকালে যে সমস্ত রাষ্ট্রবিজ্ঞানীর লেখায় জনমত সম্পর্কে বিস্তারিত আলোচনা দেখা যায় তাঁরা হলেন : লর্ড ব্রাইস, বাকল, ব্রুটসলি, হেনরি মেইন, লাওয়েল, ভি.ও.কী, কিম্বাল ইয়ং, অস্টিন রেনি প্রমুখ।

জনমতের সংজ্ঞা ও প্রকৃতি : জনমত বলতে কী বোঝায়—এ সম্পর্কে রাষ্ট্রবিজ্ঞানীরা একমত নন। সাধারণত সমাজ সম্পর্কে কোনো সাধারণ বা বিশেষ প্রশ্ন নিয়ে জনগণের অভিমত বা মতামতকেই জনমত বলা হয়। লর্ড ব্রাইস সমাজের স্বার্থ সম্পর্কিত বিষয়ে জনগণের সমষ্টিগত অভিমতকে জনমত বলে উল্লেখ করেছেন। কিম্বাল ইয়ং-এর সংজ্ঞা অনুযায়ী, কোনো নির্দিষ্ট সময়ে জনগণ যে অভিমত পোষণ করে তাকেই জনমত বলা হয়। কিন্তু লাওয়েল (Lowell) বলেন, জনমত হিসাবে গণ্য হওয়ার জন্য 'সংখ্যাগরিষ্ঠের মত যথেষ্ট নয় এবং ঐকমত্যও আবশ্যিক নয়' ("...a majority is not enough and unanimity is not required.")। সেজন্য জনগণের সমগ্র অংশ বা সংখ্যাগরিষ্ঠ অংশ কোনো মত পোষণ করলেও আস্থার দৃঢ়তা না থাকলে তা জনমত বলে বিবেচিত হবে না। তাই অস্টিন রেনি (Austin Ranney) বলেছেন, জনমত হল সেই সমস্ত ব্যক্তিগত মতামতের সমষ্টি যেগুলি সম্পর্কে সরকারি কর্মচারীরা সজাগ থাকেন এবং সরকারি কার্যাবলি নির্ধারণের ক্ষেত্রে তাঁরা এর গুরুত্বের কথা বিবেচনা করেন। অনুরূপভাবে ভি.ও.কী. (V. O. Key) বলেছেন, জনমত মানুষের সেইসব মতামতের সমষ্টি যেগুলি সম্পর্কে সরকারের সতর্ক দৃষ্টি বা মনোযোগ থাকে। বিভিন্ন রাষ্ট্রবিজ্ঞানীর মতামতের ভিত্তিতে জনমত সম্পর্কে আমরা একটি মোটামুটিভাবে গ্রহণযোগ্য সংজ্ঞা প্রদান করতে পারি : জনমত হল সমকালীন রাজনৈতিক, সামাজিক ও অর্থনৈতিক সমস্যাগুলি বা অন্য কোনো বিষয় সম্পর্কে সৃষ্টিগত ও জনহিতকর সেইসব সুদৃঢ় মতামত, যেগুলি সরকার ও জনগণকে প্রভাবিত করতে সক্ষম।

অধ্যাপক গেটেল জনমত ধারণাটির প্রতি সন্দেহ প্রকাশ করে বলেছেন, জনমত জনগণেরও নয়, মতও নয় (Public opinion is neither public, nor opinion.)। দেশের সকল মানুষকেই যদি জনগণ হিসাবে ধরা হয়, তাহলে বলতে হয় যে, সকল ব্যক্তি কোনো বিষয়েই সহমত পোষণ করতে পারে না। তাছাড়া জনসাধারণ অধিকাংশ ক্ষেত্রেই অসংগঠিত, অজ্ঞ এবং উদাসীন। সেজন্য জনমত হিসাবে যেসব মত ব্যক্ত হয় তা আসলে জনগণের নয়। অধিকাংশ ক্ষেত্রেই জনমত বলে যা স্বীকৃতি লাভ করে, তা কার্যক্ষেত্রে বিশেষ কোনো প্রভাবশালী ব্যক্তি, গোষ্ঠী কিংবা বিশেষ একটি রাজনৈতিক দলের নেতৃবৃন্দের মতামত ছাড়া আর কিছুই নয়। তাই কার্লাইল জনমতকে 'বিশ্বের সর্বাপেক্ষা বড়ো মিথ্যা' (Greatest lie in the world) বলে সমালোচনা করেছেন।

জনমতের বৈশিষ্ট্য : উপরোক্ত আলোচনার ভিত্তিতে জনমতের নিম্নলিখিত বৈশিষ্ট্যগুলি উল্লেখ করা যেতে পারে :

- ১ জনমত বলতে কোনো ব্যক্তিগত মত বোঝায় না। জনমত বলতে সমষ্টিগত মতামতকে বোঝায়।
- ২ জনমতে আস্থার দৃঢ়তা থাকা আবশ্যিক। জনমত গঠনে সংখ্যাধিক্যের সমর্থন থেকে আস্থার দৃঢ়তা অধিক গুরুত্বপূর্ণ।
- ৩ জনমত হিসাবে কোনো মতকে প্রতিষ্ঠিত হতে গেলে তাকে জনগণের সামগ্রিক কল্যাণের সহায়ক হতে হবে। জনকল্যাণকামী নয় এমন কোনো মতবাদ সংখ্যাগরিষ্ঠের মত হলেও জনমত হিসাবে গণ্য হবে না।
- ৪ জনমত হল সমকালীন সামাজিক, রাজনৈতিক, অর্থনৈতিক বা অন্য কোনো বিষয়ে সুসংবদ্ধ বা সুদৃঢ় অভিমত।
- ৫ জনমত এমন একটি অভিমত, যা সরকার ও জনসাধারণের ওপর প্রভাব বিস্তার করতে সক্ষম।
- ৬ জনমত ব্যক্তিগত ইচ্ছা, আবেগ বা অনুভূতির প্রকাশ নয়; জনমত হল সুচিন্তিত, যুক্তিপূর্ণ ও সুস্পষ্ট মতামত।

অস্টিন রেনি (Austin Ranney) জনমতের কয়েকটি বৈশিষ্ট্যের কথা বলেছেন।

প্রথমত, সার্থক জনমতের জন্য ঐক্য ও বিরোধিতা দুই প্রয়োজন। তাঁর মতে বিরোধিতাহীন মতৈক্য অকাম্য, আবার মতৈক্যহীন বিরোধিতাও বিপজ্জনক।

দ্বিতীয়ত, তথ্য সংগ্রহ হল জনমতের দ্বিতীয় বৈশিষ্ট্য। সঠিক সংবাদ ও তথ্যাদি জানতে না পারলে জনগণ কোনো বিষয়ে সুস্পষ্ট মতামত জ্ঞাপন করতে পারে না।

তৃতীয়ত, জনমতের তৃতীয় বৈশিষ্ট্য হল নির্দিষ্ট মতের ভিত্তিতে রাজনৈতিক বিষয়ে অংশগ্রহণের সক্রিয়তা। সাধারণ মানুষ যদি সক্রিয়ভাবে রাজনৈতিক বিষয়ে অংশগ্রহণ করতে না পারে তাহলে প্রকৃত জনমত গড়ে উঠতে পারে না।

চতুর্থ, স্থায়িত্ব ও পরিবর্তনশীলতা জনমতের অন্যতম বৈশিষ্ট্য। জনমত দ্রুত পরিবর্তনশীল হতে পারে, আবার স্থায়ীও হতে পারে।

পঞ্চমত, সুপ্ত অবস্থায় থাকাকে (latency) জনমতের একটি বৈশিষ্ট্য বলে রেনি মনে করেন। কোনো সমস্যা সম্পর্কে জনগণের মতামত অস্পষ্ট থাকতে পারে, ফলে সেক্ষেত্রে জনমতের গতিপ্রকৃতি অনুধাবন করা শক্ত হয়।